



CATHOLIC BISHOPS CONFERENCE of Papua New Guinea and Solomon

PASTORAL LETA 2024

Bringim ol Pikinini long Jisas

Promotim Vokesen namel long ol Pikinini na ol Yanpela Manmeri

03 Desemba, 2023, Namba wan Sande bilong Advent

Dia ol Pipel bilong God long Papua Niugini na Solomon Ailan,

Gude long yupela olgeta i kam long mipela ol Bishop bilong yupela!

Buk Baibel i gat plenti stori long ol manmeri i bringim ol arapela manmeri i kam long Jisas na tu i gat stori bilong ol manmeri i bringim Jisas i go long ol pikinini. Yumi olgeta i klia long dispela stori we, ating ol papamama i laik bringim ol pikinini i go long Jisas na ol disaipel i bin traim long stopim ol. Jisas i bin krosim ol disaipel i laik pasim rot long ol papamama i laik bringim ol pikinini bilong ol long em. I gat narapela stori we disaipel i bringim wanpela liklik boi i gat bret na pis i kam long Jisas bai liklik kontribusen bilong em i ken kamap blesing bilong plenti lain manmeri.

Long narapela stori tu, ol i bin bringim Jisas long wanpela liklik pikinini meri i dai pinis bai em i ken kirapim em na givim laip gen long dispela pikinini.

Mipela i harim plenti gutpela ripot long wok i kamap bihainim pastoral leta bilong 2022. Plenti tingting bilong wok mipela i bin raitim long dispela pas bilong mipela long 2022 na i luk olsem yupela i bin kisim gut ol toktok, olsem na plenti gutpela wok ministri long pikinini i bin kamap. Na tu plenti bilong yupela i tek pat long mekim wok.

Nau mipela i laik kirapim tingting bilong yupela ol wanwok bilong mipela long mekim strongpela wok long bringim ol pikinini na ol yangpela manmeri long Jisas.

Ol Pris

Mipela i luksave olsem sampela pris i gat bikpela presen long mekim gutpela wok wantaim ol pikinini na mipela i laik kirapim tingting bilong ol long serim dispela save bilong ol wantaim ol arapela. Ol arapela pris i painim hat liklik tasol gutpela eksample bilong wanwok bilong ol i ken kirapim ol long mekim wankain wok. Na tu yupela pris i mas wok klostu wantaim ol katekis, ol yut lida na ol Katolik Relijis Edukesen Kordinata.

Opim bel na tingting long wok bilong skulim ol pikinini na yut. Skelim gut taim bilong yu bai yu ken givim inap taim bilong wok blong yu long ol pikinini na yangpela long mak bilong namba bilong ol insait long peris we i winim samting olsem 70%. Lukim skul insait long peris bilong yu olsem wanpela autstesin.

Givim gutpela tingting na kirapim bel bilong ol papamama long luksave olsem ol pikinini bilong ol i mas kisim ol sakramen. Mipela i lukim olsem plenti pikinini i redi long kisim sakramen tasol ino gat lain i helpim ol.

Ol pris i mas kamapim ol ministri insait long peris bilong ol na givim gutpela skul bilong laip na bilong Kristen bilip ol pikinini i nidim long kamap misineri disaipel bilong Krai.

Plenti bilong ol i ken kisim gutpela skul long stap klostu long God na long Sios olsem alta boi na alta gel na tu kamap memba bilong kain asosiesen olsem Asosiesen bilong ol Pikinini bilong Maria, Misineri Childhood, Marian Yut o Junia Lijen bilong Maria. Taim ol i joinim kain grup olsem ol i helpim ol yet long kamap holi na tu helpim ol narapela long kamap holi. Ol i autim tok long ol yet na long ol arapela. Em i gutpela long bringim ol pikinini na ol yangpela long Santu Maria husait i nambawan tru stretpela disaipel bilong Jisas na Mama bilong Sios. Wantaim helpim bilong Maria I No Gat Sin, ol i ken gro long bihainim gutpela na stretpela pasin bilong Santu Maria olsem pasin bilong stap klin tru, daunpasin, pasin bilong harim tok na pasin bilong laikim. Ol dispela pasin i moa bikpela tru long laip bilong ol yangpela manmeri nau. Em i gutpela tu long ol i ken joinim kain grup olsem Sosaieti bilong Santu Vincent De Paul. Kain grup olsem i save helpim ol yangpela manmeri long lusim pasin bilong tingting long ol yet na long tingting long gutpela bilong ol arapela na laikim ol arapela.

Ol Katekis

I no long taim i go pinis Papa Santu i bin raitim wanpela pas long strongim wok bilong ol katekis olsem tisa bilong bilip. Em i strongim wok katekis olsem tru tru wanpela bikpela wok ministri insait long Sios. Long PNG na Solomon Ailan, olgeta taim ol katekis i gat bikpela wok long autim Tok bilong God na long skulim ol manmeri long bilip Katolik. I tru sampela senis i bin kamap long wok katekis, tasol em i stap yet olsem wanpela bikpela wok ministri long dispela taim nau bikos bilip bilong plenti manmeri i wok long go daun.

Ol Tisa

Ol tisa long olgeta skul i serim bilip bilong ol yet wantaim ol sumatin. Sampela taim ol i serim gutpela bilip, tasol arapela taim ol save serim bilip i no gutpela tumas. Long sampela taim ol tisa i serim gutpela bilip long stretpela rot tasol arapela taim dispela serim i no kamap ples klia tumas. Katolik tisa i mas yusim olgeta samting em i gat long strongim pastaim bilip bilong em yet na bai em inap long soim na skulim trupela Katolik bilip long ol pikinini na ol yangpela. Ol CRE tisa i mas mekim moa long dispela wok ministri.

Ol hetmasta bilong ol skul i mas olgeta taim soim Katolik aidentiti long ol Katolik Ejensi skul bilong yumi na mekim bai olgeta tisa i skulim gut Katolik Relijis Edukesen long olgeta sumatin, maski ol sumatin i katolik o i no katolik. Kristen bilip i mas stap namba wan samting long skulim ol sumatin. Yumi no mas surik long skulim Katolik bilip long ol sumatin maski ol i bilong narapela lotu. Dispela Katolik bilip yumi save tokaut, em i kam long Jisas na long ol Aposel. Yumi no ken fosim na mekim wanpela pikinini long kamap Katolik. Yumi mas traim long soim Kristen bilip wantaim stretpela pasin long laip bilong yumi yet na i no toktok tasol. Ol peris pris i mas helpim ol tisa long kisim gutpela skul bilong bilip bai ol inap long serim dispela bilip long ol sumatin bilong ol. Sapos tupela marit tisa i Katolik, ol i no ken stap poroman nating olsem marit. Sapos i tru, tupela i laikim wanpela narapela orait tupela i no ken pret long marit long Sios long laikim wanpela narapela olsem Krai i laikim Sios. Sapos

Krais i stap senta long laip bilong tupela, bai tupela inap long soim laik bilong Krais long ol sumatin bilong tupela.

Ol Papamama

Yupela ol papamama i save stap klostu tru wantaim ol pikinini bilong yupela moa long ol arapela. Skulim ol long pre na pre wantaim ol. Kisim ol i go long haus lotu. Na helpim ol long kisim ol sakramen olsem baptismo, konfirmasio, konpesio na Yukaris. Kamapim gutpela ples insait long famili bai ol pikinini i ken gro wantaim gutpela pasin na pulap long pasin bilong laikim. Skulim na soim long ol pasin bilong mekim wok marimari long helpim ol arapela man o meri i nidim helpim.

Skul bilip bilong ol pikinini i stat long haus, long famili yet. Em i ples we-papamama i save serim bilip bilong ol wantaim ol pikinini bilong ol (Evangelii Gaudium, 66). Ol Papamama i namba wan tisa bilong bilip. Taim ol i laikim na lukautim gut pikinini bilong ol long gutpela na stretpela pasin, ol i skulim ol pinis long God bikos God em yet em Laik Pasin. Long wankain taim ol papamama i no ken pret long toktok long ol, long God i husat na long Jisas Krais. Ol i mas skulim ol long pre na long mekim ol i kamap gutpela pikinini i bihainim stretpela pasin na i stap pikinini bilong God.

Ol Papamama, ol tisa na ol bikpela manmeri i mas stap klostu long ol pikinini na ol yangpela long helpim ol long wanem samting ol i nidim long wokabaut bilong laip bilong ol. Ol i mas toktok gut long ol, harim hevi bilong ol na helpim ol long skelim gut wanem samting God i laikim na ol i mas mekim long laip bilong ol. Ol papamama i mas lukautim ol pikinini gut bai ol i no ken kisim bagarap long bilong bodi, long sexual abusus na long bagarap bilong ol tingting i stap long bel bilong ol. Olsem na long dispela as tasol, long olgeta peris i mas i gat ol wokmanmeri bilong lukautim ol pikinini (Child Protection Officer) husat bai lukautim na promotim digniti na raits bilong ol pikinini. Sapos sampela lain i bagarapim ol pikinini, yumi mas ripotim ol long ol lida manmeri o atoriti. Long wankain pasin, sapos ol pikinini i mekim sampela rong yumi mas helpim long stretim ol. Rot bilong stretim ol pikinini i mas kamap oltaim wantaim laik pasin. No ken toktok strong long ol long taim bilong stretim ol, nogut ol pikinini bai pilim nogut na dispela bai i kirapim tingting nogut bilong ol long lain atoriti na pasim rot bilong helpim ol.

Wantaim spirit bilong Sinodaliti, em i pasin bilong wokabaut wantaim, mipela i askim ol lei manmeri long tek pat long fomesen bilong bilip bai ol i ken kamapim na strongim pasin bilong harim tok, stap insait long wok bilong mekim disisen na long kirapim na strongim komyuniti bilong bilipmanmeri.

Maski yumi bin mekim sampela bikpela wok pinis, tasol i gat plenti wok moa i stap long mekim. Olsem na yumi mas redi oltaim long wok bung wantaim bilong mekim gut long ol pikinini bilong yumi.

God i ken blesim yupela olgeta.

+ OTTO SEPARY

Bisop bilong Bereina

President bilong CBC - PNGSI